



**Broj: 01-03-26-004-8-II/10**  
**Sarajevo, 14.06.2010. godine**

Na osnovu člana 32. stav (1) i (2) Zakona o konkurenciji («Službeni glasnik BiH», broj 48/05, 76/07 i 80/09) i člana 210. Zakona o upravnom postupku ("Službeni glasnik BiH", br. 29/02, 44/02, 12/04 i 88/07) a po zahtjevu privrednih subjekata KOMUNALIJE HRGOVČIĆ d.o.o. Brčko distrikt, d.o.o. ĆEHAJIĆ Brčko distrikt, OBNOVA B d.o.o. Brčko distrikt, GRADSKA ČISTOĆA d.o.o. Brčko distrikt i d.o.o. INTERMONT Brčko distrikt, Bosna i Hercegovina podnesenom dana 22.02.2010. godine za pokretanje postupka protiv J.P. KOMUNALNO BRČKO d.o.o. Brčko distrikt, Bosna i Hercegovina radi povrede člana 4. stav (1) Zakona o konkurenciji, Konkurencijsko vijeće na 106. (stotinušestoj) sjednici održanoj 14.06.2010. godine, je donijelo

### **ZAKLJUČAK** **o pokretanju postupka**

1. Pokreće se postupak po zahtjevu privrednih subjekata KOMUNALIJE HRGOVČIĆ d.o.o. Brčko distrikt, d.o.o. ĆEHAJIĆ Brčko distrikt, OBNOVA B d.o.o. Brčko distrikt, GRADSKA ČISTOĆA d.o.o. Brčko distrikt i d.o.o. INTERMONT Brčko distrikt, Bosna i Hercegovina podnesenom dana 22.02.2010. godine protiv J.P. KOMUNALNO BRČKO d.o.o. Brčko distrikt, Bosna i Hercegovina radi utvrđivanja zabranjenog konkurencijskog djelovanja iz člana 4. stav (1) Zakona o konkurenciji.
2. Postupak će se provesti u skladu sa Zakonom o konkurenciji i podzakonskim aktima koji regulišu oblast tržišne konkurencije i drugim relevantnim propisima.
3. Stranke u ovom postupku dužne su na zahtjev Konkurencijskog vijeća dostaviti svu relevantnu dokumentaciju vezanu za ovaj predmet.

### **O b r a z l o Ź e n j e**

Konkurencijsko vijeće je dana 22.02.2010. godine, u smislu člana 28. Zakona o konkurenciji (u daljem tekstu: Zakon), zaprimilo Zahtjev za pokretanje postupka privrednih subjekata KOMUNALIJE HRGOVČIĆ d.o.o. Brčko distrikt, d.o.o. ĆEHAJIĆ Brčko distrikt, OBNOVA B d.o.o. Brčko distrikt, GRADSKA ČISTOĆA d.o.o. Brčko distrikt i d.o.o. INTERMONT Brčko distrikt, Bosna i Hercegovina (u daljem tekstu: Podnosioci zahtjeva) pod brojem 01-03-26-004-II/10 u kojem je zahtjevano od Konkurencijskog vijeća da pokrene postupak protiv J.P. KOMUNALNO BRČKO d.o.o. Brčko distrikt, Bosna i Hercegovina (u daljem tekstu: J.P. KOMUNALNO) radi utvrđivanja zabranjenog konkurencijskog djelovanja iz člana 4. stav (1) Zakona.

Uvidom u dostavljeni Zahtjev Konkurencijsko vijeće je utvrdilo da isti nije kompletan u smislu člana 28. Zakona i člana 2 tarifni broj 106. stav (1) tačka e) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", broj 30/06) te je u skladu sa članom 31. Zakona zatražilo dopunu zahtjeva dana 09.03.2010.godine aktom broj: 01-03-26-004-2-II/2010.

Podnosioci zahtjeva su postupili po zahtjevu Konkurencijskog vijeća i dokaz o uplati takse dostavili Konkurencijskom vijeću dana 26.03.2010.godine aktom broj: 01-03-26-004-3-II/2010, te dostavili dopunu zahtjeva dana 26.04. 2010. godine aktom broj: 01-03-26-004-5-II/10, nakon čega je Konkurencijsko vijeće utvrdilo da je isti kompletan i uredan u smislu člana 28. stav (1) Zakona, te je Podnosiocima zahtjeva u smislu člana 28. stav 3. Zakona, izdalo potvrdu dana 14.06.2010.godine, broj: 01-03-26-004-6-II /10 o prijemu kompletnog i urednog Zahtjeva.

Podnosioci zahtjeva u Zahtjevu navode da imaju registrovane šifre djelatnosti za poslove komunalnih usluga sakupljanja, utovara i prevoza čvrstog otpada od građana, pravnih lica i budžetskih korisnika na prostoru Brčko distrikta Bosna i Hercegovina i da su punih 6 godina kao najpovoljniji ponuđači, sa specijalnim vozilima, vršili predmetne komunalne usluge, kao i da su učestvovali na 11 sprovedenih postupaka javnih nabavki od strane Vlade Brčko distrikta.

Da je 2008. godine Skupština Brčko distrikta osnovala novo preduzeće J.P. KOMUNALNO i da novo preduzeće od momenta registracije mimo procedura javnih nabavki obavlja sve komunalne poslove koji su do tada bili predmet javnih nabavki i za koje je Vlada Brčko distrikta u prethodnom periodu 11 puta sprovođila postupke javnih nabavki.

Da se stavlja akcenat posebno na usluge sakupljanja i odvoza otpada-smeća od građana, pravnih lica i budžetskih korisnika, održavanje, pranje i čišćenje javnih površina, parkinga, pijaca, održavanje prohodnosti puteva u zimskom periodu, uklanjanje divljih deponija itd., jer te nabrojane komunalne usluge ne spadaju u domen fiksnih mreža struje, vode, plina i kanalizacije na koje javna preduzeća po Zakonu o javnim nabavkama Bosne i Hercegovine imaju neki prioritet, već se navedeni poslovi ustupaju ugovorom najpovoljnijim izvođačima, odabranim kroz proceduru javne nabavke po Zakonu o javnim nabavkama Bosne i Hercegovine.

Dalje se navodi da je J.P. KOMUNALNO, bez ikada provedene procedure zakonskog prenosa nadležnosti za sve komunalne djelatnosti, mimo tržišta preuzelo organizaciju i pružanje svih komunalnih usluga u Distriktu, i na taj način zloupotrebilo svoj dominantni položaj u oblasti pružanja komunalnih usluga građanima Distrikta, te ugrozilo javni interes sa jedne strane, što je rezultiralo visokim cijenama komunalnih usluga koje plaćaju građani i oduzelo pravo Podnosiocima zahtjeva na ravnopravan tretman kada su u pitanju društvena i privatna pravna lica.

Da J.P. KOMUNALNO ima naklonost i podršku od strane Zakonodavne i Izvršne vlasti Distrikta pri čemu su sva druga pravna lica registrovana za komunalne djelatnosti isključena iz mogućnosti da ponude svoje usluge na relevantnom tržištu Brčko distrikta BiH, pa stoga smatraju da su na sceni zabranjeni sporazumi Zakonodavne i Izvršne vlasti sa Upravom i menadžmentom J.P. KOMUNALNO.

Da su od momenta registracije J.P. KOMUNALNO radnici Podnosioca zahtjeva ostali bez posla, a da im specijalne mašine propadaju zbog toga što su im Izvršne vlasti Brčko distrikta ne poštujući državni Zakon o javnim nabavkama oduzele mogućnost da ponude svoj rad i svoje usluge građanima Distrikta, čime su ozbiljno narušili konkurenciju u oblasti komunalnih usluga na prostoru Brčko Distrikta.

U skladu sa izloženim, privredni subjekti KOMUNALIJE HRGOVČIĆ d.o.o. Brčko distrikt, d.o.o. ĆEHAJIĆ Brčko distrikt, OBNOVA B d.o.o. Brčko distrikt, GRADSKA ČISTOĆA d.o.o. Brčko distrikt i d.o.o. INTERMONT Brčko distrikt, Bosna i Hercegovina zahtjevaju od Konkurencijskog vijeća da pokrene postupak protiv J.P. KOMUNALNO radi utvrđivanja zabranjenog konkurencijskog djelovanja iz člana 4. stav (1) Zakona.

Na osnovu dostavljene dokumentacije Konkurencijsko vijeće je ocijenilo da nije moguće bez provedenog postupka utvrditi postojanje povrede Zakona na koje Podnosioci zahtjeva ukazuju, te je odlučilo kao u dispozitivu ovog Zaključka.

Nakon provedenog postupka Konkurencijsko vijeće će donijeti konačno rješenje u skladu sa članom 42. Zakona o konkurenciji.

## **PRAVNA POUKA**

Protiv ovog Zaključka nije dopuštena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema istog.

**Predsjednik**

**dr.Stjepo Pranjić**

### **Dostaviti:**

- **Podnosiocu zahtjeva**
- **u spis**
- **a/a**